

# O LE SULU SAMOA



EKALESIA FAAPOTOPOTOGA KERISIANO SAMOA  
O LENUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA IULAI 2025**

email: [sulusamoa@cccs.org.ws](mailto:sulusamoa@cccs.org.ws) - Main Office: Ph.24414, Ext 29 - website: [www.cccs.org.ws](http://www.cccs.org.ws)

**OSIGA FEAGAIGA EFKS LALOVI- MULIFANUA MA LE  
SUSUGA MIKA SUESUE MA LE FALETUA IA TALIHLAGI**



**ATA O LE MAFUTAGA FAAFOUINA FAIAOGA  
ASO SA EFKS MATAUTU APIA**



# O LE FAASINO UPU

- |                                                                  |         |
|------------------------------------------------------------------|---------|
| 1. LAUGA                                                         | 2 - 4   |
| 2. OSIGAFEAGAIGA EFKS LALOV                                      | 4       |
| 3. PEPA MAFUTAGA FAAFOUINA<br>FAIAOGA ASO SA MATAUTU-UTA<br>APIA | 5 - 8   |
| 4. PEPA MAFUTAGA MATAGALUEGA<br>FALEATA                          | 9 - 11  |
| 5. PEROFETA MULIMULI                                             | 11 - 13 |
| 6. FEAU O LE ASO                                                 | 13 - 15 |

## LAUGA

Tusi Faitau: Mataio 16: 13 – 20

Matua: f.15 – 17, “15 Ona fetalai atu lea o ia ia te i latou, “A o outou, pe se a la outou upu ia te a’u, po o ai?” 16 Ona tali mai ai lea o Simona Peteru, “O oe o le Keriso, o le Alo o le Atua soifua.” 17 Ona tali atu ai lea o Iesu ia te ia, “Amuia oe Simona Pāiona; auā e lē se tagata na ia fa’aali atu ai ia te oe, a o lo’u Tamā o i le lagi.”

Manatu Autu: **Ua vaai Peteru ia Iesu: o le Alo o le Atua Soifua**

Manatu Aoao Vaiaso: **ILOAINA O IESU**

O loo i ai i le Tusi Fesili a le Aoga a le Faifeau, fesili nei: O ai na ulua’i molimau o Iesu o le Alo o le Atua soifua? O le tali, o Simona Peteru. Sosoo mai ai le isi fesili, Na faapefea ona iloa e Peteru o Iesu o le Alo o le Atua soifua? E 3 mafuaaga, na iloa ai e Peteru: “**auā sa mafuta ma Iesu, sa vaai foi i vavega, sa faalogo foi i fetalai tau le Tama i le Lagi.**” Mafuta, vaai, faalogo. Na faagasolo le galuega a Iesu pe a ma le 3 ma le afa tausaga, e tala’i le Malo le Atua, e ala i ana a’oa’oga matagofie, o upu alofa, o faataoto ma lauga. Na o faatasi ma le faatinoga o galuega alofa, o vavega eseese i faamalologa o ma’i, tulia o temoni, na avatu le

mapusaga i e sa puapuagatia. E le’i i ai se tagata na sulufa’i atu na foi fua, a e na inu malie uma i le alofa faamaoni o Iesu.

A o se avanoa lelei foi lea na tuu e Iesu, e iloa ai e le tagata ia, po o ai lea o loo mulimuli i ai, e fua i lana mafuta, lana vaai, ma lana faalogo. E tatau ona uma ane lenei taimi umi, ua silafia lelei e Iutaia le tagata o Iesu; peitai e lē o lea le tulaga. Sa i ai nisi na tau ‘ite’ite ia Iesu ma lona tulaga ese, a e sa le’i mautinoa; e pei o Ioane na auina ona soo e fesili ia Iesu, poo ia lea le Mesia ua maliu mai, pe latou te faatali i se isi? Na tali Iesu i soo o Ioane, Ta’u ia Ioane mea ua oulua vaai ma faalogo ai – ua savavali pipili, ua pupula tauaso, faamamā lepela, tutuli temoni; ua folafolaina foi le Tala Lelei i e matitiva. Mafuta, vaai, faalogo; e fua iina lana faamasinoga, ma lona iloa o Iesu.

Lea la ua iite fanua a lalo, o le a alo apefoe faatini, o le a sii le matālalaga, ua lata le i’uga o lana galuega. Ona la ave lea o ona soo i le aai o Kaisareia Filipino, ma fesiligia ai, pe se a le upu a tagata ia te Ia poo ai? E eseese lava tali, eseese iloa o tagata; a e taga tutusa uma, o le ituaiga iloa papa’u, faavae ina ua faamalieina manaoga masani o le ola - ua na o se Faia’oga poto ma atamai, se Foma’i lelei ma aogā, se ta’ita’i alofa ma se A’oa’o e lē faailoga tagata, e le’i fefe foi i le au faresaio ma ta’ita’i o le Lotu Iutaia. Na iloa i le vaai o mata faaletino; a e le’i pupula mata o le agaga. Fai mai, o Iesu e tutusa lava ma isi perofeta, e i ai Elia na fai foi ana vavega, po o Ioane le Papatiso, auā sa le ‘alo lona leo faaperofeta e a’oa’i tagata faafiaamiotonu.

Ona fesili lea o Iesu i le toasefulu ma le toalua, A o outou, se a la outou upu ia te a’u, o ai a’u? Ona tali lea o Peteru, ***O oe o le Keriso, o le Alo o le Atua soifua.*** O le ta’utinoga lauiloa lea a Peteru, i se tasi o taeao faitaulia o le galuega a Iesu – le Taeao nai Kaisareia Filipino. O le aai o Kaisareia Filipino, o se aai e itiiti i totonu o Kalilaia; sa le’i afea lava e Iesu a o femaliua’i i lana galuega, ona sa i ai lona faamoemoe mulimuli ane, e i ai le taeao lenei. O le igoa Kaisareia e fanau mai le igoa Kaisara, ma le igoa Filipino o igoaipu, o tupu o Roma. O le aai e fausia i luga o laufanua papa, i auvae o le mauga o

---

Heremoni; e i ai le ana e ta'ua o le Faitotoa o Seoli, e faapea tala tuu, o le faitoto'a lenei sa ulufale ai atua faapaupau i Seoli. Ma o le natura lea o laufanua ma le tala faasolopito o le aai o Kaisareia Filipino, na filifilia faapitoa ai e Iesu, i ona uiga loloto faafaatusa, mo lana anavatau fia faalauiloa, o Lana Faigamalo.

O a ia faatusa? O lona faatāua o le aai e itiiti, o lona amana'ia ma aloaia, o nofoaga faatauva, na te faia ai vavega ma fa'aalia ai lona mana, e tupu ma atia'e ai lona malo; e pei ona ia faatāua le tagata vaivai ma lē taualoa, e faamāina ai mea popoto ma le malolosi o le lalolagi. 'Aua e te faameo, e fefe pe popole i sou faatauva, e fia fa'aaogaina e Iesu lo tatou vaivai, na te faia ai vavega mo le faamoemoe mo lana galuega faaola. O le itiiti a lega mea. Na te filifilia le faatuatua e ui ina ititi pei o le fua o le sinapi, a o le faatuatua e ola ma tupu laulauā.

Na la filifili le aai o ta'u ai igoatupu sa logologoā, o faigamalo sa tuufaasolo o le lalolagi, o pulega faaRoma i lo latou ma'ema'e, a ua mavae ese atu e pei o le puao, o aputi o saito ua lelea i le matagi; e lē faatusalia i ai lona Malo e faavavau, ma lana pule e aoao e leai sona mutaaga. O lana Ekalesia o le a faavaeina. O laufanua papa o Kaisareia Filipino, ua faatusa i ai o Ia lava, Iesu Keriso le Papa, o Ia le faavae o le Ekalesia; e faatusa foi i ai le ta'utinoga faalefaatuatua a Peteru, o le ituaiga ta'utinoga lea, ma le silafia maua'a pei se papa, o saili ma finagalo ai Iesu. Le ituaiga iloa, e mautū ma anagatā, e lē mafaia e Seoli ona manumalo ai – o a sauaga, o tofotofoga eseese e lu'itau ma faavaivaia ai le ola mulimuli ia Iesu, e lē toe maluelue ai le faatuatua faaPeteru.

*“O oe o le Keriso, o le Alo o le Atua soifua.”* Pe a talatala teisi le tali a Peteru, ua ia ta'utino atu, o oe Iesu, o le Mesia valo'ia o Iutaia, o le Keriso filifilia mai le vavau, o le Faaola e lē na o Iutaia, a e aofia ai Eleni, Roma ma nuu ese uma, o le lalolagi atoa; o le Alo pele e toatasi o le Atua, ua auina mai e faataunuu le finagalo paia o lona Tama, ia ola le fanau a tagata.

Ua togi pa tau i le 'ave, le upu a Peteru; ua logo i tino matagi lelei, le ta'utinoga loloto, e sa'o ma sagatonu. Ua aogā aso e tele na mulimuli ai Peteru, na la mafuta ai, na vaai ma faalogo, talu ona valaauina e fai ma fai faiva i tagata. Ua o gatasi le futia ma le umele, i le suia mai ia Simona a e faasuafa ia Peteru, ma lona tula'i mai e taulamua, tu malosi e ta'ita'i le galuega fa'auau a le Ekalesia. Lea ua to lona matupalapala; ua fa'aamua Iesu, *Amuia oe Simona le atalii o lona, auā e lē se tagata na fa'aali atu ai ia te oe, a o lo'u Tama i le Lagi.* Amuia le tagata e mamao lana vaai, e loloto lona iloa, i le Keriso le Alo o le Atua. O le fa'aamua lava lea i soo se tagata faatuatua, e molimau ma ta'utino atu Iesu i le lalolagi, e ala i le upu, e ala i le amio, aemaise i le soifua tautua faamaoni ia te Ia.

O le upu a le atunuu, 'E sa'o a e lē 'a'o' Ua manaia le iloina e Peteru o Iesu, a e i ai lona. Na manatu pei o le lautele, o le Keriso e fai lana galuega i le malosi faafitafita ma auupega o taua. Na te le'i taliaina se Keriso e fai lana faaolataga i le ala maulalo ma le agamalū, e puapuagatia, po o le Alo o le Atua e faatigaina ma maliu fasia. Na fetalai Iesu o le a latou o a'e i Ierusalem e tauluga lana galuega, e tuuina atu o Ia i lima o ona fili e faasauaina, e faatigaina se'ia oo ina faasatauro, a e toe tu mai. Ma sa iloga le ita le tete'e o Peteru i lea ta'utinoga a Iesu, ma faia ane, E lē oo lena mea ia te ia. Ona otegia lea e Iesu, Alu ese ia oe Satani i o'u tua, ua fai oe ma faalavelave ia te a'u; auā e lē o mea a le Atua e te loto i ai, a o mea a tagata.

O se feau faamanatu lelei foi lea mo i tatou i lenei masina. Ina toe silasila ifo le tagata ia, pe se a lona silafia o Iesu, o tatou tapua'i ma mulimuli i ai. Ina ia 'aua tatou te mulimuli tauaso pe masalosalo, pe faaluafesasi, pe faalotolotolua. A ia mautinoa lelei, o sagatonu lo tatou faatuatua i lo tatou Alii Faaola, lo tatou Keriso, o Ia o lo tatou Atua moni e toatasi.

Pe afai foi e alu alu suaga a le vaatele, a e faasolo ina puaoa le vaai ia Iesu, ua faavaatu'ia le iloa ma tau solomuli ona o faafitauli ma faaosoosoga a le fili, pe ua mamafa foi le avega, ia toe manatua le Taeao nai Kaisareia Filipino. O loo fesili mai pea Iesu

ia te oe ma a'u, pe se a la ta upu ia te Ia? Ia toe faamalosī teisi. Toe faamumū le ola mafuta vavalalata ma lou Alii, ia feuluuluta'i ma mafanafana le masaniga ma Ia, e ala i le tatalo ma le ola tapua'i; faalelei foi le va fealoa'i ma isi uso faatuatua; ia toe faamalosī le pupula o la tatou vaai faaleagaga, i fa'aaliga mamana o lona alofa tausī mai i aso taitasi; ma ia tatala o tatou taliga e faalogo, ma ia manino le faafofoga o le loto ma le agaga, i le uiga loloto o lona fetalai mai, e ala i le faitau o ana Afioa Paia ma faalogo i lana Upu folafolaina.

E lē uma feau o le malo o Keriso, auā o le Malo e faavavau. Ua tatou aga atu foi i le tau o faiga taulaga tetele a le Ekalesia, e taualuga ai lo outou soifua tautua i le Atua i lenei tausaga. E tuu mai lava i le saolotoga o le tagata, e fai taulaga e tusa ma lona iloa o Ia o loo fai taulaga i ai. Na mulumulu e Iesu vae o ona soo. Ona Ia fai atu lea, *“Ua ou avatu le fa'aa'oa'o ia te outou, e pei ona ou faia ia te outou, ia faapea lava e outou ona fai. E moni, e moni, ou te fai atu ia te outou, e lē sili le auauna i lona alii; e lē sili foi lē ua auina i lē e ana le feau. Afai ua outou iloa ia mea, amuia outou pe a outou faia.”* O i tatou uma o auauna, e tasi lo tatou Alii; o i tatou uma ua auina atu e Iesu e fa'aauau le galuega o le Tala Lelei, e leai se tasi e sili na o Ia. A e ua Ia fa'aamua ma faamanuia mai, pe afai ua tatou iloa o Ia, ma lana fa'aaoga o ua faia: Pe afai ua tatou iloa ia mea, amuia i tatou pe a tatou faia.

Le Ekalesia pele a Iesu Keriso, ma le au faitau Sulu Samoa i lenei masina, o le uiga lea o lona faalupega o le Keriso, o le Alo o le Atua soifua. E ui ina o Ia lo tatou Matai ma le Alii, a ua na fai o Ia ma auauna, ua ofo fua mai lona soifua atoatoa e faaeaea i tatou, e ala i lona maliu tiga i luga o le satauro, a e na toetu manumalo mai le oti ma le tuugamau, e faamamā faamagalo a tatou agasala, ma ia tatou saofagā i le ola faavavau. Pe a tatou iloa ina o Ia i le salamō faamaoni, ma faatuatua atoatoa ia te Ia. Ia tumau ia te Ia le viiga e faavavau. Amene.

**Saunia e le Faatonu Sulu**  
**(e sui ai le Lauga na atofa o lenei masina).**

## **OSIGA FEAGAIGA** **EFKS LALOVI**

O le Aso Faraile 27 Iuni 2025, na osi ai le feagaiga a le EFKS Lalovi Mulifanua, Pulega Aiga i le Tai, Matagaluega Aana, ma lo latou faifeau fou susuga Mika Suesue ma le faletua ia Taliilagi. O le susuga i le Toeaina Faatonu ia Taise Ioapo (FT) na ta'ita'ia le sauniga ma le osiga feagaiga. O susuga i faafeagaiga taulagi o le Pulega na lagolago i isi vaega taua o le sauniga - Faitauina o le Tusi Paia o le susuga ia Piilua Sao (FS) - Tatalo saunia e Hemi Faatonu (FS) - Lauga Autu o le susuga ia Napoleone Vaiaso (FS)- Lauga Faalaeiau mo le Aulotu o le susuga ia Ieremia Saufoi (FS).

Na faatumulia le malumalu o le Ekalesia i Lalovi i le mamalu o le Ekalesia, o aiganalua, o toeaiaina ma faletua, a'oa'o ma tiakono ma o latou faletua o le mamalu o faafeagaiga ma o latou faletua aemaise uo ma aumeamamae e molimauina le faamoemoe o lenei Ekalesia.

O le susuga i le faafeagaiga ia Mika o le lupe faalele a aiga ma afioaga o Poutasi ma Satalo i Falealili, ao le faletua ia Taliilagi o se taulaga soifua a aiga ma le ekalesia i Malaemalu i Falealili.

Na ulufale le susuga ia Mika ma le faletua i Malua i le tausaga 2019, ae faai'uina i le 2022. Ole tausaga 2023 na galue ai le susuga i le faifeau i le Ofisa Tutotonu o le Ekalesia i Tamaligi i le vaega o Aseta a le Ekalesia i lalo o le Matagaluega o Tupe, ae galue le afioaga i le faletua ia Taliilagi i le matagaluega o Aoaoga Kerisiano seia oo ina valaauina i laua mo le galuega tausī nuu. Ua sui atu i laua i le galuega ina ua tuumalo le susuga ia Tauapai Tufi (FS).

Na faaiu le sauniga i le Talisuaga Paia a le Alii na saunia e le susuga ia Mika Suesue ma taualuga ai i faaaloaloga masani .

Ia manuia le alo atu i le galuega, o le leoleo mamoe i le lafu mamaoe a le Atua, ma le folafolaina o le Talalelei ia Iesu Keriso, ma ia avea lo outou soifua galulue faatasi ma le EFKS Lalovi, e manuia ai le Ekalesia ae faateleina ai le viiga o le Atua.

\*\*\*\*\*

---

**PEPA MO LE MAFUATAGA FAAFOUINA FAIAOGA ASO SA MATAUTU-UTA APIA**  
**04-05 IULAI 2025**  
**MANATU AUTU: “IA TUPU TELE KERISO” | “MAY CHRIST INCREASE GREATLY”**

**Matua: *Ioane 3:30***

“E ao ina tupu pea o ia; peitai a’u nei, e tauāu ina ititi o a’u”  
“He must increase, but I must decrease”

**Upu faafeiloai:**

Fai mai le upu: O le fanua ma lona tapu-a-fanua  
O le maa ma lona taatiaga  
O le laau ma lona tulaga  
O le tagata ma lona faasinomaga

Ae ou te le’i taiaina ao o maugaloa ma tatala le ta’afi tualua, lea na ifo ai le aso o le aiga sa Sa’umani, e muamua lava ona ou faatulou atu i le paia ma le mamalu ua sasao nei tulou, tulou, tulona lava. E maualuga ai pea le viiga o le Atua ona o lona alofa ma lona agalelei aemaise o lana tausiga o lo tatou soifua ma le ola. O lea ua tatou fesilafa’i i I mauga o ao, ae le o mauga o liulaumea ile soifua maua ma le lagi ma tafi. Faatulou i paia o Samoa le au mamana, le afua mai o le Taisamasama, Tuimanu’a, le Falesefulu aemaise ai Pule ma Tumua. Faatulou i ou paia faa-le-talalelei, Le taeao nai Mataniu Meagaimaleata, Faleu ma Utuagiagi, Malaeola ma Gafoga.

Susu o lau susuga i le faatama ma le Faatina o le aiga faiaoga aso sa EFKS Matautu-uta (Apia), lau susuga i le faafeagaiga a le paia o le Alosina, Fuaifale o Salevalasi, pola puipui e le Faletolu ma le Vagalelepa, lo la toalua ma upu ia Tuisamau. Soifua manuia i lau susuga i le taitai, susuga i le sui-taitai, taitai o vasega taitasi faapea le loaloa o le mafutaga faiaoga aso sa 2025.

**Faatomuaga**

O upu o le manatu autu e afua mai i le molimau o loo faamauina i le tusi o Ioane. E faatatau i le faamoemoe autu o Iesu ina ia faaolaina le lalolagi. A tonu e foliga faigofie le manatu autu a o lona faatinoina, o le matafaioi a oe ma a’u o le faiaoga aso sa ina ia a’oa’o, folafola, molimau ma faailoa atu auala e tupu tele keriso i alo ma fanau o le ekalesia. O le a taumafai lenei pepa e faitau le manatu autu mai se vaai faa-tautua ma faaogaina ai le “Tautua Matalilo”

**Tusi a Ioane**

Ua nofo malamalama Ioane i le mea e gata ai lana feau faa-le-talalelei. Mo Ioane, o Iesu o le Atua ua liutino tagata. Leai lava la se tasi e sili atu nai lo le keriso. I le aotelega o manatu o le tusi o Ioane, ia faatupu tele keriso i soo se tafa o le soifua ma le ola.

Christ should continue to grow in every dimension of life;<sup>1</sup>

1. In our hearts – His love, truth, and presence shaping our thoughts and desires.
2. In our character – Becoming more like Him in humility, service, and compassion.
3. In our ministries – So that it’s not our personality that’s seen, but Christ’s light.
4. In the church and society – His teachings influencing culture, justice, and relationships.

---

O le tusi tala o se tasi o soo na mulimuli ma militino faatasi ma Iesu i le taimi o lana galuega. Sa vaai ma molimau i vavega ma faamalologa na faia e Iesu.

E tele ma anoanoa'i sutesuega e faatatatu lava i le tusi lenei a Ioane, ua tele foi tamaoaiga eseese aemaise o le oa faa-le-agaga o mataupu aemaise o a'oa'oga taua. E molimau ai i le tele o vaevaega eseese ma faamamafa a sikola taitasi.

O le faataua o lenei pepa o le silasila a le tusitala o Ioane poo ai Iesu, lea la ua faamauina;

*Table 1: How Jesus portrays in the Book of John*

| <b>Title/Identity</b> | <b>What it means</b>                   |
|-----------------------|----------------------------------------|
| Word made flesh       | God became man to live among us        |
| Lamb of God           | He take away the sin of the world      |
| Son of God            | He is divine, fully God                |
| Savior of the world   | He came not to condemn, but to serve   |
| Giver of eternal life | Faith in Him leads to everlasting life |

O loo faamauina i le Ioane 20:31 le faamoemoe atoa na tusia ai le molimau a le aposetolo o Ioane. “*A ua tusia ia mea, ina ia talitonu ai outou, o Iesu o le Keriso lava ia, o le Alo o le Atua, ina ia maua ai foi le ola i lona suafa e outou o e talitonu.*” O le molimau a Ioane o Iesu o le Alo o le Atua, Son of God, e ese mai molimau a isi fai-evagelia.

*Table 2: Gospels overview of Jesus*

| <b>Books</b> | <b>Themes</b>                  |
|--------------|--------------------------------|
| Mataio       | Jesus is King <sup>2</sup>     |
| Mareko       | Suffering Servant <sup>3</sup> |
| Luka         | Jesus for all <sup>4</sup>     |
| John         | Jesus is God <sup>5</sup>      |

O le galuega folafola a Ioane le papatiso pei foi na faamauina e le tusitala, ia tapena le ala mo le Alii. “*Ou te le aoga ona tatalaina le nonoa o ona seevae*”<sup>6</sup> O se tautinoga mautinoa ma o se molimau o lona faatupuina o le galuega a Iesu ae faamaulalo o ia e tusa ma lona valaauina o le teuteu ala. A faatupuina, o lona uiga ia iai soona siitiaga mai le mea sa iai, ia maualuga atu lona tulaga fou nai loo le tulaga tuai, ia sili atu, ia faaopopo, ia faateleina.

### **Tautua Matalilo**

E le taua pe iloa e tagata lau tautua, o le mea taua o loo sisila fofoga o le Atua. To serve quietly or humbly without seeking attension or recognition. Tele muagagana, ma alagaupu e maua mai i le tautua, ma e tele ituaiga tautua i le aganuu faa-samoa, ma e iai foi tautua e tutusa lava lo latou faatinoina.

*Table 3: Tautua Matalilo Translation*

|          |                                      |
|----------|--------------------------------------|
| Tautua   | to serve                             |
| Matalilo | Behind the scenes, in secret, unseen |

I le tu ma le aganuu faa-samoa, e le o tautua uma e vaaia e mata, pei lava o le au gasese, o i latou sa faia galuega lelei, o moli, o le tapenaina o se fale ae le'i amataina se faamoemoe. O le ata faigofie lea o le tautua matalilo e pei ona filifili e faitau ina ai le matua poo le manatu autu foi o le mafutaga.

Filifili Ioane i le Tautua Matalilo ina ia faamaualugaina le viiga o Keriso. O le tautua foi lea o loo laualuga ai le soifua faitaulaga a le Ekalesia Aoao mo le manuia o lana ekalesia. E lilo i mata o le Ekalesia Aoao lau taulaga sa faia mo le Atua, tusa pe sa faia ma le lotomalie, tusa foi pe sa faia ma le tomumu ma le oi. O loo sisila fofoga o le Atua

A o le tautua e le soona oso iai se tasi, o le tautua e faia ina ua lagonaina le lotomaulalo, lagona le lotomalie o le tautua mo le manuia o se faamoemoe. O le tautua e timuia, laina, e sautia e pogia. Ae faia ma le agaga fiafia.

### Matua: Ioane 3:30

O le matua filifilia mo lenei mafutaga ua maua mai i le Ioane 3:30 *“E ao ina tupu pea o ia; peitai a –”T–”H nei, e tauāu ina ititi o a –”T–”H”*. I le gagana eleni: *“κενον δε αPζάνειν, μρ δρ λαττοσθαι”*

Table 4: Translation

| Greek     | English                                             | Samoaan          |
|-----------|-----------------------------------------------------|------------------|
| κενον     | Him                                                 | Ia               |
| δε        | it behoves (to be necessary/fitting for)it is right | e ao             |
| αPζάνειν  | to increase                                         | tupu             |
| μρ        | me                                                  | a’u              |
| δρ        | however                                             | peita’i          |
| λαττοσθαι | to decrease                                         | tauau ina itiiti |

Mo le talatalaina o lenei pepa, e faaaogaina ma faamamafaina upu e lua o loo taua i le matua e fatufatu ai manatu ma lagona, a o se feau faamalosiau mo le mafutaga pele.

#### 1. *“αPζάνειν” – to increase*

O le upu faavae ma lona faaaogaina aemaise lona pasiaina i le gagana Eleni, o loo faapea mai *“Present active infinitive”*. O lona uiga pe a faamatalaina, o se upu galue. E le gata o le upu galue ae active, o se upu e galue faaauau, faifai pea, tuputupu pea, faateleina.<sup>8</sup>

#### 2. *“λαττοσθαι” – to decrease.*

E faavae mai i le upu λαττώ *“Present Passive Infinitive”*. Present tense e atagia ai foi o se upu faaauau, e le na o sina taimi e faaitiiti ai, a o le faifai pea ia avea ma masani le faaititi ifo. O le iai lalo *“λαττοσθαι”* i le vaega o le gagana “passive voice” o le vaega tonu lea o loo leotele ai le filifiliga saoloto a le tagata e faia ma le lotomalie. E le tauanauina, e le tau faatonuina, e le alu i taiga, e le auai ona o se mea e maua mai.<sup>9</sup>

Table 5: Summary (to increase & to decrease)

| Root Word       | Focus           | Spiritual Meaning                         |
|-----------------|-----------------|-------------------------------------------|
| αPζάνω (auxanō) | Christ increase | Christ becomes central, active, magnified |
| λαττώ (elattoō) | We decrease     | Self becomes humble, quiet, and returned  |

O lea ua manino le mata o le vai, ua togo foi malama. Lea ua tafa mai ata o taulelei i le tagata e faasino ai le “tupu” / “to increase” e pei ona ia le Manatu Autu o le mafutaga **“IA TUPU TELE KERISO”** ma le tagata e faasino i ai le “faaitiiti” / “to decrease” o oe ma a’u.

O le meamautinoa, o le faaitiitia o oe ma a’u e lē uiga tutusa ma le lē vaaia *“disappear”*, a ia mafai ona tatou faia se avanoa e sili atu mo le ola ma le faamoemoe o keriso i totonu o le tatou mafutaga.

### Tautua Matalilo – Ia tupu tele Keriso

Manatu o le ua maua malama, I le fesootaiga o le Tautua Matalilo ma le Tupu tele Keriso. O le manatu o le pepa i lenei afiafi, o le tautua matalilo e fesootai lelei ma le faa-itiiti o oe ma a’u. O le faatino ai o la tatou auauna o tatou o faiaoga aso sa, e le o se galuega e faigofie, e le o se galuega foi e maua ni totogi. O le galuega faa-faiaoga aso sa e matalilo i le tele o taimi o lo tatou soifua ma le ola. Matalilo i au tapenaga mo mafutaga i Aso Toonai taitasi, ae a maea foi aoaoga o le aso Toonai, e maua fesoasoani e toe tapena matalilo ai foi le faiaoga aua le aoaoina o le fanau i aso sa taitasi. Lilo i la tatou vaai, a o le

---

taimi lava lea o loo tatou faatupuina keriso. A leai se tautua, ua manatu mama i le valaauina. O lona uiga, a leai se tautua ua lē tupu tele keriso.

### **Faatatau**

Le paia o le mafutaga faiaoga aso sa Matautu-Uta Apia, O upu o le matua *“Ia tupu tele Keriso, a ia faaitiitia a u,”* o le vala’au lea mo Kerisiano uma ina ia ola ma le loto mauualalo, ma faamamalu ai Keriso i lo tatou lava tagata. I le aganu’u faa-Sāmoa, e mafai ona fa’atino lea manatu i le tautua - o le auaunaga fa’amaoni e faia ma le fa’aaloalo, le alofa, ma le loto filemu. E le o le tautua e sailia ai le viiga, ae o le tautua e sau mai le loto e fia fa’aaloalo i le Atua ma fesoasoani i isi. E pei lava o Ioane le Papatiso na ia fa’afo’iina le fa’amamalu i Keriso, e tatau fo’i ona tatou tautua i se auala e fa’aitiitia ai lo tatou tagata ma fa’ateleina ai le mamalu o le Atua i totonu o aiga, ekalesia, ma nu’u. O tautua i matua, i latou ua ave ma taitai, o le fesoasoani poo le tatalo filemu mo se tasi - o nei ituaiga o tautua matalilo o ni auala tāua e fa’aalia ai le faatupu tele o Keriso i le olaga fa’a-Sāmoa.

### **Application**

As a teacher, it is easy to fall into the trap of becoming the center of attention. But John the Baptist reminds us: we are not the Messiah — we are the messengers. Our job is not to make students admire us, but to help them love and follow Christ. Every lesson, every prayer, and every act of service should direct their hearts toward Jesus, not our knowledge or title. True spiritual leadership is rooted in tautua matalilo — the kind of service that is not loud, proud, or performance-based. Teachers must be the first to show up, the last to leave, and often do the unseen work: preparing lessons, praying for students, cleaning the room, or following up with struggling youth. This kind of leadership decreases self and increases Christ in the eyes of those we serve. Students often imitate not just what you say, but how you live. If you model a life of humility and Christ-centered service, they will begin to understand what John 3:30 looks like in action. This means listening more than speaking, correcting with gentleness, and letting others lead when it helps them grow.

Manuia ona o Iesu, Amene

### **(Footnotes)**

<sup>1</sup> Issler, Klaus.

*Living into the life of Jesus: The formation of Christian character*  
. InterVarsity Press, 2012.

<sup>2</sup> Gafa o le Tupu o Tavita e pei ona amata ai le tusi a Mataio, o le sootaga tau tupu o Iesu o le lalolagi

<sup>3</sup> Le Iesu puapuagatia, e pei ona amata lava le molimau a Mareko i Papatisoga ma ave loa i le vao e faaosoosoina ai.

<sup>4</sup> Iesu mo tagata uma, o Luka o le fomai. O se galuega fesoasoani mo tagata uma. O le faamoemoe o le Tusi a Luka ina ia faaola le lalolagi uma.

<sup>5</sup> Silasila i le faatomuaga o le tusi a Ioane,

*“Sa i le amataga le Upu, sa i le Atua le Upu, o le Atua foi le Upu. O ia lava sa i le Atua i le amataga.”*

<sup>6</sup> Ioane 1:27e

<sup>7</sup> Ekeinon dei auxanein, eme de elattousthai.

<sup>8</sup> To grow, to increase, to become greater, to expand.

<sup>9</sup> Passive voice tells us this decrease is willing and surrendered  
– not forced

***Saunia : Loia Kolia***  
***EFKS Matautu, Apia***

---

# **PEPA MAFUTAGA FALEATA 2025: SE VAAIGA FAATUPULAGA TALAVOU I LE GALUEGA FAAMAFANAFANA A LE EFKS**

**Matua:** *Salamo 23:4, “O lau la’au ma lou to’oto’o e faamafanafanaina ai a’u”*

## **Upu Tomua.**

I le suafa mamalu o Iesu Keriso le Ao o le Ekalesia, ou te faafeiloa’i atu ai i le paia mauuluga o le Matagaluega i ona tulaga faalupe. Malo le soifua maua ma le lagi e mama. Ou te faatulou, e tula’i ma le migao, tautala foi ma le fa’aaloalo tele. E muamua ona faamau le viiga i le Atua, ma le faafetai i le Komiti mamalu, ona o lenei tofiga mauuluga i lo’u faatauva. O se avanoa foi e faamau ai le faafetai ona o le fai ma usufono talavou a le Matagaluega, a o faailoga le 150 tausaga o le Fono Tele i lenei tausaga.

A o le a faasaga loa e faailoa se manatu e tusa o le Autu. O lenei taumafaiga, e faavae i lo’u avefa ma tagata lotu o le EFKS, o la’u maitau ma molimau i nisi o tu ma aga, o faiga ua masani ai le tatou Ekalesia. Na saili fesoasoani foi i nisi tusitusiga, o nisi o le aufaigaluega, ma nisi auala ina ia maua se Pepa e talafeagai ma le paia mauuluga o le Mafutaga a le Matagaluega. Ua vaevaeina ai lenei Pepa i ni vaega patino, e otooto ai se manatu.

## **O le a le Uiga o le Galuega Faamafanafana?**

Ua ou faauigaina lenei galuega faamafanafana, o ni galuega o loo fai e le tatou Ekalesia, e a’oa’oina, apoapoa’iina ma faamafanafanaina ai matou o tupulaga talavou, i le soifuaga e tata ai, o le avefa ma soo o Iesu. E faasino foi i faiga eseese o loo fai e le EFKS i le taimi nei, e faatupu fiafia ma faamafanafana i tupulaga talavou, ina ia tumau ai pea le fiafia e tapua’i, ma lolotu, ma auauna i le Atua i totonu o le EFKS. O le tulaga lelei o nei faiga, ma saga faaleleia atili, o le a tumau ai pea lenei lagona mafanafana, ma tupu atili ai le faatuatua i le Atua. Pe afai foi e i ai ni vaega e faigata ona talia e le mafaufauga faatalavou, pe faaititia ai lea lagona mafanafana, e aogā foi le toe iloilo i ai o le faautaga ma lauliliu i ai se tofa o le Ekalesia, mo le gasologa manuia pea i luma o lana galuega faamafanafana.

## **1. Afoga Paia a le Atua:**

E i ai lo’u talitonuga o le auala sili lea ona lelei, e mautinoa lona faamafanafana mai – o le Upu poo Afoga paia a le Atua, le Tusi Paia. Aemaise pe afai e lelei le auala e faaoo mai ai, e ala i lauga, a’oa’oga ma tautalaga, e malamalama gofie ai le faalogo a le tupulaga talavou. Ia te a’u lava ia, o loo manaia tele le tulaga o lauga a le aufaigaluega i susuga i Faafeagaiga ma A’oa’o Fesoasoani, a le tatou Matagaluega. E maitauina ua i ai lava le faava’a e faasolo ai lauga a le tatou Ekalesia. Peita’i, e i ai nisi taimi e faigata ai ona ou mulimuli i le lauga, ma lē maua se mafanafana i le feau tau momoli mai, pe afai e maotua ma loloto le gagana e fa’aaogā (gagana faa Mataupu Silisili pe Muagagana faa Samoa), pe faaumiumi foi le taimi o le lauga (ua silia ma le 20 minute). O nisi foi taimi, e sili ona manino le feau, pe a o faatasi le faapalagi ma le faaSamoa. E moni lava, o Afoga paia a le Atua, o le sulu lea i o’u vae, ma le malamalama (ma le mafanafana) i o tatou ala.

## **2. Tapua’iga & Tekonolosi.**

Ua maitauina le tulaga ese o le auala e tapua’i ai la tatou EFKS, mai isi Ekalesia ma Lotu eseese. E pei o le nonofo i lalo pe a pepese, e sãõ pe a fai talosaga ma le lauga ‘o lona aotelega, e tapua’i filemu. E faapea foi i la’ei tapua’i, e faamalosia ai la’ei papa’e, o peleue ma fusiua o alii, ma pulou o tamaitai. Pe ona o le tulaga lea na tapua’i ai Samoa anamua, pe o ni tulaga na aumai e misionare, pe o loo a’oa’oina i Malua, a ua taliaina lava e lo’u talavou nei auala, ona e ola mai ua masani ai. A e faafetai o loo fetu’utu’una’i, ma fa’aaogaina foi nisi metotia ma auala faaonaponei, e pei o siva faaleagaga, o fati ma ituaiga musika e fetai ma matou mana’oga faatalavou.

Ou te fa’aaloalogia le taofiofi mamau pea o le aufaigaluega i Toeaina ma Faafeagaiga, faapea le au matutua i auala tuai ua masani ai. O loo latou silasila toto’a foi ma le faautauta i le fa’aaogaina o auala faaonaponei ma suiga tetele faatekonolosi, i totonu o sauniga lotu. Ou te fiafia tele auā ua faataga le fa’aaogā o le wi-fi, lap top ma projector, o Bluetooth speakers, i-pads, tablets ma isi; aemaise le telefoni o loo tapu’e ai ata, e pu’e ai faigalotu ma lauga e faalogologo ai i latou o loo faamuli mai.

A o telefoni foi, ua i ai i totonu kopi o a tatou Tusi Pese, ma le Tusi Paia faaSamoa. Peitai e maitauina, le faasā ona pepese, pe faitau le Tusi Paia mai le telefoni, i totonu o sauniga lotu. E talitonu e i ai mafuaaga lelei, e faia ai lea tapu. A e ou te lagolagoina tele le saga fa’aaogaina

---

o nei meaalofo i auala tataui, e lē gata i tapuaiga, ae faapea foi i aga fesootai, e faasalalau ma folafola ai le Tala Lelei. E pei o le upu, E sui faiga, a e tumau faavae.

### **3. Polokalame mo Tupulaga Talavou.**

O polokalame ma mafutaga faatupulaga talavou, o nisi ia o tu ma aga ua saunia e le Ekalesia e faamaopoopo ma faamausalī ai le nonofo fealofani o tupulaga a le Ekalesia. O polokalame faaleagaga, tausinioga i faafiafiaga, o taaloga, aganuu ma isi o loo saunia e le Ofisa A'oa'oga Kerisiano, faapea foi polokalame e faamaite lava i le lotoifale faaAulotu, Pulega ma le Matagaluega. O ni avanoa lelei e faatino ai a matou taleni ma agavaa faatalavou ua foai mai e le Atua. O faatinoga nei o loo tapu'e ai pea le mafutaga vava lalata ma le mafanafana a le Ekalesia i ana tupulaga. Ma'eu le matagofie o le faamoemoe na faafiafia ai le tatou Matagaluega i le Fono Tele. Manaia mafutaga faa-Pulega a Aoga Aso Sa ma Autalavou o loo fai i Aso Malii ma le Toetu, faapea aso malolo o le Lotu Tamaiti. E i ai nisi Autalavou, e fai a latou So'o; a o la'u maitau, e mafuli nei faiga faaso'o i le va o Autalavou e nonofo valavala ma va va mamao. Ae ai foi se manaia pe afai e faatino pea nei So'o, i totonu o le Pulega lava ia e faigofie le felataa'i, i le va o autalavou e fesuisuia'i le faafalelua pe faafaletolu. Ia faafaigofie ma pupu'u faatinoga e fai, ae ia tuu le faamamafa ma le tele o le taimi, i le mafuta militino faatasi, e faatupu atili ai le mafana o le masani, fealofani ma fefaasoa'a i le agaga faaEFKS.

### **4. Fesagaiga e Faamafanafana ma Apoapoa'i (Counseling):**

O le auala lea o le talanoa ma faasoa, i le va o le susuga faafeagaiga ma lona faletua, ma le vasega o tupulaga talavou. O se auala lelei tele lenei ua ou molimauina, ma maua ai lo'u mafanafana, auā ua tupu ia te a'u ma lo'u aiga; e lē gata o feiloa'iga i ala o tiute ma faiva, a e faapea foi i taimi e oo mai ai asiasiga a le susuga i le faafeagaiga i Aso Toona'i o vaiaaso taitasi. Ou te ta'utino atu sa i ai so'u faafitauli, a ua mafai ona toe sologa lelei, ma maua lo'u filemu ina ua faamalosi ma faamafanafana mai le Tamā o le galuega, le auauna a le Atua. O le upu moni, ou te fia maua pea lea faamafanafanaga i se laasaga faia soo (regular counselling); ia lē gata i taimi faasamasamanoa, o taimi o asiasiga, a e ia aami faapitoa mai foi i matou i lona ofisa, e faasoa, talanoa ma tausoa faafitauli o talavou, e saga faamalosi ai le ola ia Keriso. Pau o lea, faamolemole ia puipuia malu (personal issues to be kept confidential).

### **5. Osiga Taulaga i Tupe ma Taumafa**

O mea nei e lē mafai ona misia pe tu'u, i soo se mea fai a le Ekalesia - o faiga taulaga ma faiga taumafa. E lē toe tau tolaulauina le mau ituaiga lafolafoga eseese e fai i Aso Sa uma, ma ituaiga galuega eseese, faapea ituaiga sailiga tupe eseese a aulotu ma isi faalapopotoga a le Ekalesia. E leai so'u manatu e faaseā pe tete'e i lea vaega tāua ma aogā, o le soifua tapua'i ma tautua i le Atua - e fa'aogā ai tupe ma taumafa faapea fa'aaloaloga a le atunuu. Ou te faalogo soo i le upu lea, *'E sili le manuia o lē foa'i, nai lo lē na te talia.'* Ia tatou alu ai pea faapena ona ua masani ai, e faia lava i le usita'i auā e sili lena nai lo le ga'o o le mamoe po'a; ae talosia e lē o fa'aogā sesē lea fetalaiga a Iesu, e fai ma ufiufi o le mana'o tele i tupe, o se mea o loo faasā mai foi e le Tusi Paia (1 Timoteo 6:10). O lea foi ua sauni atu i Faiga Taulaga masani i le faai'uga o le tausaga, ma ua amata foi ona sasao mai e matua, tusaga i o matou talavou faigaluega, o loo ta'i lua vaiaso ma maua totogi, ma tau amata atia'e aiga. O le a faia lava i le usita'i ma le onosa'i, ma le alofa i le Ekalesia a Keriso.

Sa ou maitauina i le Fono Tele talu ai, le tele o manaoga tau tupe i vaega eseese o le EFKS. Ae ua ou maofa ma le faafetai, i le soifua faitaulaga o la tatou Ekalesia e tali atu ai i nei mana'oga tau tupe. O se faamafanafanaga lea mo a'u, i le vaai ma le faalogo atu, i le soifua faamalolosi ma le loto tetele o tamā ma tina o augatupulaga matutua o le Ekalesia, e fai ma lu'itau ia i matou foi.

### **6. Mafanafana i Ta'ita'i, Pulega & Faai'uga Amiotonu.**

O lenei vaitaimi, ua leai se vaipanoa o le atunuu e lē lagonaina ai talanoaga ma fa'aaliga o finagalo, i le mataupu faasino i le sailiga o le amiotonu, aemaise lona sao faapea lona aafia i le filifiliga o ta'ita'i o le atunuu (e leai so'u malamalama tele i lea mataupu). A e sa ou faalogoina foi lea ituaiga talanoaga, i totonu o le lotoifale o le Ekalesia, ma lona sao i le faiga filifiga o ta'ita'i o le Ekalesia na taualuga ai le Fono Tele. Ou te lē manatu mamafa foi i ai (not interested). O upu a le atunuu, *'E lē aiā mo'o i liu o vaa';* ou te lē aiā i le ta'ita'iga o le tatou Ekalesia.

Ae manatua foi le pese a tama Faleata, *'Ne'i mama tele lo ta vaa, e leai so'u leo faamafanafana...'* Na pau le faanaunauga ua ala ai ona ou ta'ua lenei mataupu, ona e lagona lava lo matou mafanafana, pe a faalogo ma vaai o ta'ita'iina le sa o la tatou Ekalesia, tainane le sa



mata'utia o le a tupu. E oo lava i le igoa o le fuafuaga a Nikolao - Gaioiga Uranusa - sa fai ma faalavelave ia Karai muamua. O le igoa na maua mai se manumalo ua leva o Rusia i le Taua Lona Lua a le lalolagi faasaga ia Siamani. A o lona manumalo sa le'i maua mai se gaioiga se tasi. Na taunuu manuia i se faasologa o ni gaioiga fuafua lelei. E lua gaioiga: Uranusa sosoo ai ma Saturina.

A o sola ese Karai mai le fale faaofuofu, na faailo atu e Nikolao lea mea. E i ai le isi gaioiga tele lea o le a amata, a e o fea e fai ai, a o le a foi le auala e faatino ai? Na tatagi mai le telefoni.

Na tatala e Karai ma tuu i lona taliga. "Faatonu Koloue?"

"O faapefea mai outou i lona itu?" Na fesili mai ai Painateri.

"O loo lelei e pei ona fuafuaina."

"O lea ua tapena atu lo outou auala. E i ai le malae vaalele umia tumaoti, pe tusa o se maila i fafo atu o le Sone Faasāina, sa fa'aoga mo le au valaaulia fa'aaloalogia o le sauniga. Ua faataga mai e le vaega'au a Peretania le fa'aogaina o se tasi o ana vaalele. O loo latou taumafai e toe faasa'o faalelei lo latou matagā i lo latou lē faalogo lelei ia Porofesa Matesone, o se tasi o la latou lava vaega'au. O lea ua ou faatatagiina le faailoilo o lapataiga. Ua salalau fa'aafi le tala i alaleo o le vaega'au e faasino i le osofaiga na lē taunuu i Kerenopili. Mo le saogalemu pea, o lea ua faasolo le ave'ese o tagata, a o lona lava ua outou muamua mamao i luma mai lenei gaogaosā."

"Malo lava, ua lelei tele." Sa le'i teena e Karai le taofiga, o le siufofoga to'a o le Faatonu sa fesoasoani e aveese lona losilosivale. E le na o ia o loo i totonu o lenei mataupu.

"E maitau atu sa fai si outou pisi i lenei aso, lau susuga i le Ta'ita'i."

"E pei foi o oe...a e ou te lē manatu ua mae'a."

"O le a le uiga o lau tala?"

Na faasoa atu e Karai le faamatalaga a le senatoa Rusia faapea foi e uiga i ona vaivaiga.

"Faatali laia," na fai atu ai Painateri. "O lea matou te iinei ma Kati Pariatu ma Malekoma Ieni. O lea laa tuu oe i luga o le sipika."

Na talanoa atu pea Karai, e faamatala lona fefe ma popole i se isi gaioiga lona lua, o se fuafuaga faasino i le toatele atu o tagata e afaina ma malilui ai.

Na faalogologo atu ai foi Koualasaki a o tapena e Elisapeta se faapipii i ona manu'a. "Faamatala i ai sieli pini," na ia valaau atu ai.

Na faanunumi atu mata o Karai. O tua i le fale faaofuofu, sa taumafai ai Elena e lapata'i atu Koualasaki

e uiga i se mataupu a o le'i solomuli atu i tafatafa o Nikolao, peitai sa matua'i lē malamalama le tamaloa, na ia lē iloa ai le uiga o lona faaliliuga.

"E te iloa," na tatao atu ai Koualasaki. "Le valusefuluvalu sieli pini."

Na lagona atu le leo musumusu o Kati i luga o le telefoni.

"O le a lana tala lona sa fai?"

"Ou te le manatu o malamalama i le.."

"Na ia fai mai kela-pini?"

"Leai, o sieli pini!"

Na lue le ulu o Koualasaki, ua malie. Na lūlū le mafaufau o Karai. Sa le'i talitonu o ia o loo fai lenei talanoaga.

Na sosoo ai ma se talanoaga faafinauga, a o fetufaa'i Painateri, Kati, ma Malakoma i se mataupu. Sa le'i mulimuli atoatoa ai Karai. Na ia faalogo atu ia Kati o fai le tala e uiga i le numera valusefulu valu na tusi i le toto.

Na leotele mai le leo o Malakoma, ua sagisagi fiafia, faasaga tonu ia Karai ma Kati. "Pe mata o le mea lona sa oulua faalogo ai, o le upu Keliapinisiki?"

"Keliapinisiki?" na fesili leotele atu ai Karai.

Na fālō i luga le ulu o Koualasaki.

O Karai lenei ua faataavale ona mata. "Masalo o lona."

Na lagolago atu foi Kati.

Na tautala vave mai Malakoma, o le faailoga manino ua fiafia le fomai faapitoa mo faama'i. "Na ou tau ane i le igoa lona. Mai le nasu o loo vevesi ai nei, sa ou lē maua se avanoa e saili ai lona uiga."

"E ā?" na tuli tatao atu ai Karai.

"O le tino o Foma'i Poleki. O faailoga o kasa faavevela mai vaega o lona māmā sa fetui lelei ma faailoga o kasa uraniuma ma pulutoniuma, faaniukilia sa fa'aoga i Kerenopili. Peitai o lona e silafia, o su'esu'ega mulimuli na toe ufitia ai lona faai'uga. Sa le'i manino mai e pei ona sa ou manatu ai muamua. Sa foliga mai o lona tino sa faaleagaina i le fefiloi o ituaiga kasa vela ma oona eseese, e ui ina o le malosi aupito sili lava, o aafiaga mai fafie punaoa mai Keronipili."

"O fea le mea o outou aga'i i ai i nei tala?" na fesili ai Kati.

"Na faavae a'u sailiga i le Vaega o Malosi Faa-atomika Faavaomalo, i faamaumauga o sone vela. Peitai e tasi le sone o le lalolagi sa aupito sili ona otaotā lona kasa, sa faigata ai ona iloa se ituaiga e tasi. O le sone lona o Keliapinisiki, i le ogatotonu o Rusia. Sa natia e le Sovieta Iuni le fatu o ana maina uraniuma ma atina'e pulutoniuma i Mauga Urale o loo iina. Mo le lima sefulu tausaga, sa faasā ai tagata ona solia lona nofoaga. A e talu ai nei pe lua tausaga talu ai, na faato'ā toe tatala ai lona vavao." Na ia malolo teisi ina ia faamamafa lana

---

folasaga. “O totonu o Keliapinisiki sa eli ai ma faaputu ai le kasa fafie mo Keronipili.”

Na nofo sa’o i luga Karai. “Ma e te manatu o iina sa faaonā ai Fomai Poleki - e le o le nofoaga sa i ai le afi, a o le mea sa gaosi mai ai lona suau’u. I Keliapinisiki.” “Ou te talitonu o lena. E oof oi i le numera valu sefulu valu. Na fausia e Rusia aai i lalo o le eleele e eli ai maina i atu mauga o Urale, ma faaigoia i faailoga o a latou meli. Keliapinisiki fasefulu, Keliapinisiki fitusefululima.”

Na atili ai ona toe patapatatū le tātā o le fatu o Karai. Na ia iloa nei le mea e agai i ai. E oo foi i le faailoga o numera o meli.

Na malamalama foi Painateri. “O le a ou logoina le vaega’au a Peretania. Ta’u i ai o lea e te alu i se maimoaga faaturisi. E tatau ona latou tuu atu oe i Atumauga Urale i se itula pe sili itiiti atu.”

Sa tatalo Karai o loo lava le taimi.

E faitau miliona o le a maliliu.

Ina o taunuu atu le limosine i le faitotoa lona lua e siaki ai, ma talo atu i fafo e se leoleo foliga lē lava, sa fa’auau atu Painateri. “Peitai, lau susuga le Ta’ita’i, i se taimi puupuu faapenei, e lē mafai ona ou avatu se lagolago i lalo o le fanua iina.”

Na fai atu Karai a o folau atu le limosine i fafo atu o le Sone Faasaina ma o atu i totonu o le laufanua taalaelae. “Ou te masalo ua i ai le tulaga lena.”

**(Faatonu Sulu)**

---

## **FEAU O LE ASO**

**Aso Sa, 27 Iulai 2025.**

Tusi Faitau: Mataio 16: 13 - 17

Manatu Autu: Ua vaai Peteru ia Iesu: O le Alo o le Atua Soifua

O le ta’utinoga lauiloa a Peteru ia Iesu, **“O oe o le Keriso, o le Alo o le Atua soifua”**, o se tasi o taeao iloga o le galuega a Iesu – le Taeao nai Kaisareia Filipino. O Kaisareia Filipino, o se aai e itiiti i totonu o Kalilaia. O le igoa Kaisareia e tupuga mai le igoa Kaisara, ma le igoa Filipino, o igoa tautupu o Roma. O le aai e fausia i luga o laufanua papa, sa

i ai le ana e ta’ua o le Faitoto’a o Seoli, e faapea tala tuu, o le faitoto’a lenei sa ulufale ai atua ma tagata faapaupau i Seoli. Na filifilia faapitoa e Iesu le nuu lenei, ona o le natura o lona laufanua ma lona tala faasolopito, i ona uiga faa-faatusa, mo lana anavatau fia faalauiloa o Lana Faigamalo.

O a uiga faatusa? O le faatāua e Iesu o le aai e itiiti, o lona amana’ia ma aloaia lea i lana galuega, o nofoaga faatauva, na te faia ai vavega ma fa’aalia ai lona mana, e tupu ma atia’e ai lona malo; e pei ona ia faatāua le tagata vaivai ma lē taualoa, e faamāina ai mea popoto ma le malolosi o le lalolagi. ‘Aua e te fefe pe popole i sou faatauva, e fia fa’aaogaina e Iesu lo tatou vaivai, na te faia ai vavega mo lona faamoemoe, mo se manuia o le lalolagi.

Na Ia filifili le aai o ta’u ai igoatupu sa logologoā, o faigamalo sa tuufaasolo o le lalolagi, o pulega faaRoma i lo latou ma’ema’e, ua mavae ese atu e pei o le puao, o aputi o saito ua lelea i le matagi; e lē faatusalia i ai lona Malo e faavavau, lana Ekalesia, ma lana pule e aoao e leai sona mutaaga. A pele ia te oe lou nuu, lau Matagaluega ma lau EFKS, fai ni mea ofoofogia e ta’uleleia ai, ma viia ai le Ao o le Ekalesia.

O le faatusa o le laufanua papa, e faatuina ai lona malo. Ma le ana o faitoto’a o Seoli o i ai. E lē tau faia se finauga iinei poo ai le papa, auā o lo tatou talitonuga faaPorotesano faaEFKS, o Iesu Keriso le Papa, a e lē o Peteru, poo se isi lava tagata. O le ta’utinoga faaPeteru, ia Iesu le Keriso, o le Alo o le Atua, o le ituaiga ta’utinoga lea, ma le silafia maua’a lea o soo se tagata faatuatua, e finagalo ai Iesu, ina ia fausia ai lana Ekalesia, e mautū ma anagatā, e lē mafaia e faitoto’a o Seoli – o sauaga, faaosoosoga, o tofotofoga eseese – ona manumalo ai.

Ua fa’aamuia Iesu ia Peteru ona o le loloto o lona iloa o Ia. O lana fa’aamuia foi lea mo le au faatuatua uma ua faaolaina, e molimau ma auauna faamaoni ia Iesu le Keriso puapuatatia, le Alo o le Atua soifua, na maliu i le satauro ma toe tu manumalo, e faaola i tatou. Tumau ia te Ia le viiga e faavavau. Amene.

**Aso Gafua, 28 Iulai 2025**

Tusi Faitau: Mareko 9: 14 – 27

Manatu Autu: Talitonu ma le lē talitonu.

---

O se tala faanoanoa tele lenei mo le au soo o Iesu, ina ua tiliola atu i ai le ma'i o le tama ua ulufia e le temoni, ina ia faamalolo, a e paga lea, ua latou lē mafai. Na faaleo le tiga o le finagalo o Iesu i lenei mea, auā o le toilalo o le au soo, o le ta'uvalea foi lea o lo latou ta'ita'i. A o le a se aogā o aso e tele na vaai ai i vavega na fai e Iesu, ma ana a'oa'oga ia faatupu ai lo latou faatuatua? A o se isi foi a o se tasi o le to'a 12! E foliga mai sa na o le faatino'ao lava i autafa o Iesu, nene'e i le tofi ma mitamita i le ta'u o so'o filifilia, a e faata'eta'ealuga le iloa o Iesu. Pe na faamoemoe foi i sina iloa teisi ua maua, a e lē faamoemoe ia Iesu o Ia e ana le mana e mafaia ai. Ui i lea, ua nonofo atu fua o Ae. E le'i talitonu e mafaia mea uma i le suafa o Iesu.

Na saili pea le tamā o le tama ma'i mo se lavea'i ia Iesu, e ui ina sa faaluafesasi foi lona faatuatua, pe mafaia e Iesu pe leai. A e faafetai i le alofa o Iesu, na te lē teena soo se tasi e sulu atu ia te Ia. E le gata sa Ia faamalolo le ma'i o le atalii, a e na Ia faamalosia foi le faatuatua o le tamā. O la Iesu ia te ia, *"E mafaia mea uma lava i le faatuatua!"* E oo lava i le tagata ua oti, e pei ona sa manatu ai le motu o tagata, a e faigofie ma mafaia e Iesu ona toe faatuina mai, auā sa Ia talitonu ma faatuatua i le Atua le Tamā.

O le feau o lenei aso, ia faamalosia lo tatou faatuatua ia Iesu, na te mafaia mea uma. A o tatou feagai pea ma tiute ua valaauina ai i Lona malo, tainane i feau masani o tautua ai, e leai lava se isi malosi tatou te faalagolago i ai, na o le faatuatua ia Iesu. Aua le faamoemoe i mea ua vaaia, a e faalagolago i le mana le vaaia o Keriso. Ua tatou aga atu i faiga taulaga o lenei tausaga, 'aia le fefe e fai faasiliga mai lona tausaga; 'aia le fefe ne'i faigata ona ausia le isi laasaga i lona tausaga. Faatuatua ia Iesu e mafai, ona mafai lava lea; na te foa'i mai i auala e le'i mafaufauina, pe afai e talitonu i ai. Ia manuia feau o le aso. Amene.

### **Aso Lua, 29 Iulai**

Tusi Faitau: Ioane 20:26 – 29

Manatu Autu: Ua talitonu Toma

O le tala ua masani ai i vaaiga o le Toetu, ma le a'oa'oga masani i le ituaiga faatuatua faaToma, ua toe faamanatu mai mo i tatou; le ituaiga faatuatua se'iloga e vaai tino mata, ma pa'i i ai lima e faamaonia, ona faato'a faamalieleina lea. Ina ia 'aia tatou te pei o Toma, le tuai ona talitonu ia Iesu. Atonu e fetauti le ituaiga talitonu lea, i taulumaga masani o le soifuaga, i mataupu faasino

i isi tagata. O lenei vaitau ua lē iloga le mau tagata taufaasesē, taufaase'e ma taufaavalea, ua lē iloa poo ai a talitonu i ai. Aemaise le mau faatosina o palota, ua maoa i folafolaga a lea tagata ma lea vaega faaupufai i mea a latou faia, e leai se isi e talitonu i ai, se'i vagana lava ua faatino ma ua mafai ona vaai i ai ma tagolima i ai i a latou folafolaga. E aogā ai le faiga a Toma – 'aia le soona talitonu i isi tagata ma a latou folafolaga, 'aia le seetia gofie i upu molemole ma laugutu suamalie e folafola mai; ia manatua foi o le faatuatua, e o faatasi ma le atamai a'oa'oina lelei, e mataala i le tiapolo e sau faafoliga, ae le se faatuatua faavalevalea. O le talitonu lena i isi tagata.

Peitai, pe afai o se mataupu tau le silafia o Iesu, ma lona finagalo ma ana faamanuia, ia 'aia lava ne'i masalosalo pe faalotolotolua le faatuatua, 14 'aia le faamoemoe se'i faamaonia i mea vaaia, a ia talia ma le atoatoa e sa'o ma lelei, auā o Iesu o Ia o le upu moni ma le ola. O lona alofa ma lona amiotonu, ua manino lea i ana a'oa'oga ma ana galuega, taualuga i lona maliu tiga ma lona toetu manumalo.

Pe a tuu mai i lo tatou ola galulue ma tautua i le galuega o le Tala Lelei e ala i lau Aulotu ma le Ekalesia, ia 'aia le fesiligia le moni o le faamanuia a Iesu i lou tautiga i soo se auala. Ua uma ona Ia folafola ia Toma, i lona faamanuia ia i tatou uma, e talitonu aunoa le vaai ma le tago, tau lava o le talia i le loto ma le agaga. O le faamanuia lava lea i soo se tagata faatuatua e auauna mo Ia, aunoa le fesili mo se tau, aunoa le fia vaai ma fia tago muamua i manuia e faamaonia ai.

Manatu o le tuai foi lea o le laalaa i luma ma siisii i luga o le Ekalesia i le tele o vaega, ona o le itiiti o le talitonu ma faatuatua ia Iesu. Ua tele le faalagolago ma faamamafa mea e vaai ma tago i ai, o mea e pala ma 14 Ša ai e mogamoga. Pe lē o lea foi le mafuaaga o le tele o faai'uga lē tonu ma lē alofa, ua afaina ai le soifua faatuatua o nisi, ona o le faaToma o faai'uga, e faaletino faaletagata, e leai se faamagalalo na o le tau ma sui ma le lotovale. Ia manatua, e silafia lelei e Iesu lou loto ma lo'u agaga, e pei ona sa Ia a'oa'i ia Toma, i lona fa'aali ai i le Toetu.

Manuia feau o lenei aso. Ona o Iesu. Amene.

### **Aso Lulu, 30 Iulai 2025**

Tusi Faitau: Galuega 3: 11 – 16

Manatu Autu: I le suafa o Iesu

---

O se tasi foi lenei o tala ua tatou masani ai (pe afai e faitau soo lau Tusi Paia, ma alu i le lotu e faalogo i le lauga a le faifeau); i le faamaloloina e Petu ma Ioane, o le pipili i le faapaologa o le Malumalu i Ierusalema. O le faamalologa sa faia i le suafa o Iesu, na savali ai ma osooso fialia ma vivii i le Atua, le pipili talu ona fanau mai. Na muamua lava ulufale i totonu o le malumalu le pipili ina ua savali. O se faamanatu lelei mo i tatou, o a manuia ua maua i soo se auala, ia muamua lava foi i le Atua e fai le faafetai ma le viiga i lona suafa.

O le faitauga o lenei aso e faasino i le lauga a Peteru na fai i le motu o tagata, e faamatala ai le vavega ma le togafitiga ua toe savali ai le pipili. O la Peteru, o le suafa o Iesu lea ua tino mai ai mea ofoofogia ua latou molimauina, auā o le suafa e i ai le paoa paia, le mana ma le malosi uma lava, o le suafa e alofa faamaoni i soo se tagata, o le suafa e mafaia ai soo se mea ʻ faigofie pe faigata. Fai atu Peteru i le motu o tagata Iutaia, o Iesu lea na auina mai e le Atua, sa le i taliaina e o outou tamā, ma latou fasioti faatautau i le satauro ma le manatu e faamuta ai o Ia ma galo atu ai lona igoa, peitai na toetu manumalo ma o loo soifua pea. O le suafa o Iesu lena, ua savali ai le pipili.

E faamanatu mai i lo tatou ola o aso uma aemaise le ola auaua ma tautua ia Iesu, ina ia tumau lo tatou faatuatua faamaoni i lona suafa e mafaia ai mea uma, aemaise i mea tiga ma avega mamafa. O le a le foliga pipili mai o tulaga ua oo i ai le soifuaga nei, ‘aua le loto vaivai ‘aua foi le atuatuvaale, tau ina valaau i le suafa o Iesu ma le faatuatua, ona suia lea o ia laasaga uma, mai le pipili i le faasavali ma tula’i malosi. Manatua le nofoaga sa faia ai le faamalologa, ia faapena ona faamasani ma faalatalata i le malumalu e tapua’i ai ia Iesu ma vivii i lona suafa; e te valaau atu ai, a ua silafia foi ma masani o Ia i lou leo tauvalaau atu.

A o se isi foi itu, ua toatele tagata ua latou fa’aaoga sesē le suafa o le Alii o Iesu, e saili ai o latou mamalu ma manuia o le lalolagi nei. Ua lē folafola le suafa o Iesu ina ia faaola ai tagata puapuagatia, a ua fai ma ala e saga faapuapuagatia ma faapologa ai le fanau a le Atua. Sa le’i faapea Peteru ma Ioane, o soo faamaoni e tala’i le suafa o Iesu, na oo lava ina fasiotia i la’ua ona o le Tala Lelei a Iesu. Amuia i latou e ta’uta’u ma fa’aaoga tonu le suafa o le Alii, mo le manuia o isi tagata, ma le viiga o le Atua. Manuia feau o lenei aso. Amene.

## **EFKS Highlands**

O le EFKS Highlands, Pulega Melepone Tutotonu, Matagaluega Vitoria i Ausetalia, na faavaeina i le Aso Sa, **24 Iulai 2016**. O le tausaga nei ua atoa ai le 9 tausaga, talu ona faavaeina lenei Ekalesia, ma le osiga feagaiga ma lo latou faifeau, le susuga Onesemo Mareko FS ma le faletua ia Avau. O le Aso Sa 27 Iulai 2025, i le sauniga lotu o le taeao e masani ai, na ou ta’ita’iina ma faailoga ai lenei aso tāua o le tala faasolopito o lenei Aulotu o le EFKS. Na molimau le susuga Onesemo e tusa ma le gasologa manuia mai o le galuega i lenei 9 tausaga, i le ta’ita’iga alofa a le Atua, o loo si’itia ai pea i luga le soifua faatuatua, le soifua osi taulaga, faapea le aofai o Matafale galulue ma Aiga Lotu talu ona amata mai, e oo mai i le taimi nei.

O loo fa’aaoga e le Ekalesia i le tulaga faalisi, se tasi o falesa o loo i lalo o le vaaiga a le Malo (City Council), ma ua tuuina ane foi se fuafuaga e mafai ai ona faatauina ma umia saloto lea malumalu, pe a oo ina latou gafatia le tau. O le Aso Toonai 26 Iulai na se’i ai le LULU a le Ekalesia, na maua ai le tupe \$94,000 toese ai faailoga tupe \$20,000 maua ai le latou tupe mamā e AU\$74,000+. O lea faamoemoe sa auai ma molimauina e le Pulega, le susuga i le Toeaina ia I’aeve Lagaaia FT ma le faletua ia Faafouina (ua sui tulaga ia Paul & Taulogomai Gray ua penisione), faapea le aufaigaluega i faafeagaiga ma latou faletua, ma nisi o A’oa’o ma Tiakono.

E faamauina ai faamanuiaga a le Sulu Samoa, ma le Ofisa Tutotonu o le EFKS, mo le faamanatuina o le 9 tausaga o le EFKS Highlands, ma ia alofa le Atua faamanuia i taualumaga uma ma le gasologa o le galuega, i lau susuga le Faafeagaiga ma le Faletua, ma le paia maualuga o le Ekalesia, i nisi tausaga e tele o i luma.

***(Faatonu Sulu)***

\*\*\*\*\*



SUSUGA FAAFEAGAIGA IA MIKA SUESUE MA LE FALETUA IA TALILAGI MA O LA TAUAIGA



FAIAOGA A'OGA ASO SA EFA MATAUTU APIA



AULOTU EFKS HIGHLANDS